



DETANGTANGKO NAMATNA
KIANIAN

MA-APARANGNI DALNANGANI ONG-A

E. W. Harding, D.D.

1940

No.20

13-9-16/7

DETANGTANGKO NAMATNA SKIANIARA
MA·A PAARANGNI DAI NANGANI ONG·A.

GARO

**I. Detangtango namatna skianini
nanggni, namgni aro dal·nikgnini a·selkò chàñchie
nichengna hai.**

Mande bi·sa a·gilsako atchichengon bilgrisranggipa bakgitchak ong·a, indiba chonbegipa bilgrigipao mikkangchini namana ba namgijana ka·pana bang·a amgnirang chipchanga gnang. Iarango uina ma·a paa, atchu ambi, budetang bitchitang aro uni skanggipa tongtong bak nanggipa ma·gitchamrang pagitchamranganiko man·rika.

Ua man·rikaniko dilatani, bamatani, ranta ka·ani, aro skiatanion ua bi·sani brigipa cholon aro rasong jringjrotni ong·gni pangchaka. Chongmotan ua bi·sa brienba rongtalgipa ba ong·sigipa ong·genma, ua mandera·gniko man·na kragipa ba mandeskani matnanganiko aro mitchinikaniko man·na kragipa ong·genma, ua chasongtango dakchakgipa aro namatgipa ong·genma, ba brangatgipa ba nisiatgipa ong·genma ?

Ia man·rikaniara gisikni aro be·enni biding ong·a. Be·eni bidingni kri ma·a paaoni bi·sa an·tangan mikronrangni, kni aro bigilni rong ba rokomko man·rika, ma·ani ba paaniba mikkang bimangkoba man·rikronga, basakoba basakoba ua ma·ani ba paani be·eni chu·sokgijanirangko aro maiba saarangko man·ninggniko

man·rika, aroba basakoba basakoba detangni atchiantal kana ong·ani ba kore chaani a·selara ma·ani ba paani ba uamang sakgnini chu ringrakani a·seloni nabaa, aroba basakoba basakoba detangni duk ong·baani a·sel ma·ani ba paani tilekanioni ma·ao ba paaon nabagipa mitchinikbegipa saani rog dongani a·sel ong·a, da·nang ! Iarang aro iarang gita be·enni man·rikani ong·a.

Gisikni bidingo man·rikani gisikni gunrang aro uarangko ong·baatgnirang ong·a, chongmotan gisik seng·anina ba seng·gijanina dakanganirang, ka·onangrakanina ba sontol ong·anina dakanganirang, sronggija dakani ba agananina ba sronga dakani ba agananina dakanganirang aro uandakarang gisikni biding ma·a paaoni detangona man·rikgnirang ong·a.

Ma·ani aro paani namako aro namgijako dakani bite nanganiko uamang an·tangtangsan cha·pagiparang ong·aija, basakoba basakoba detan·lang aro detangtangni detangtangba cha·pagiparang ong·pana nanga. Nama aro namgijako dakanganirangko man·rikani gimin ia janapataniara sastroo indine sea baksa nangrima, chongmotan "Anga Jihova nang·ni Isol sanalgipa Isol, pagiparangni namgijana dedrangni kosako, angko mitchinikgiparangni gitangipa a·songni kosako, aro brigipa chasongni kosako sasti on·gipa, aro angna ka·sagiparang aro angni ge·etanirangko manigiparangna, hajal hajalangna, ka·sachakako mesokgipa ong·a". (Re·ong. 20:5-6). A·gilsako atchigipa bakgitchak sakanti indakgipa be·eni

aro gisikni gunrang ba ong·bagnirangko man·rikoba, ua brienba ma·a gitasan ba paa gitasan ong·ja, ua an·tangan uamang sakgnioni aro pilak sakgipinrangoni dingtang an·tangni gimin aganchake on·na nanggnigipa mande saksa ong·a. Jeba ong·chong, sakanti pilak sakgipinrangoni dingtang ong·oba, ia a·gilsako tanga dipet mandeskarang baksa sakanti nangrimaniko dakna, ku·mongna, ka·rimna, cha·rim·ringrimna, dukko chakchikrimna nanggnigipa ong·a. Ia a·selni gimin ia dai nanggnirangko krae chotna amgnigipa ong·bana gita, bakgitchak intaltal brijana kingking bi·sako skiani aro ranta ka·ani namen dal·gipa dakna nanggni ong·a, maikai ua bi·sa janggi tanganini pilak dakna nanggnirango mandeskarang baksa ka·sagrike, ku·monggrike, ka·rimpae nangrimanio dal·rorogen aro maikai a·gilsako tanga dipet ua an·tangna aro mandeskarangna pilak dai nanggnirangko dakgen aro chu·sokatgen.

Matburungrangni bi·sarang dumanu ru·utgija an·tangni cha·aniko am·na aro an·tangtangna warachakna aro rakkina changrongbaa. Indiba mande bi·sa indake ong·ja. Ru·utmanosa briaia, aro ia brikujani somoi ong·mitingo bi·sa aldumittangani, ranta ka·ani aro skiatanini gimin sakgipinrango pangchakbatna nanga. Ia somoiara ma·a paana, mondolina aro skulna bi·sani cholonko name re·dilna aro ong·katatna Isolni on·a chol ong·a. Maina bi·sani cholon nom·engmitingon ba brikujamitingon gonggeoba dimbregatna altubata. Aganani gnang, "Bol

bi·sa ong·mitingo uni cheksi jekai dakanga uagitan bol dal·gipa ong·gen". Bi·sa, brikujamitingo, uni chanchiani aro dakani bewalrangko ong·atani aro namatani sal ong·a, indiba bi·sa brienba uarang namjaode namatna namen neng·bata. Sastroo indine sea gnan, "Bi·sako uni re·na nanggni re·anio skie taribo; aro bilsa bang·ahaoba ua unoni ekjawa" (Toe Ski. 22:6).

Mande bi·sa atchion da·osan janapa gita man·rikaniko man·a. Unbaksaba ia a·gilsakon bi·sani samtangtangchi ma·manti ong·anirang, bilrang, majognirang, dakchakgnirang, didiatgnirang, ka·dongatanirang, ja·gitotatgnirang, an·saoatgnirang, ong·siatgnirang aro nisiatgnirang gnan, jerangan bi·sani dal·roromitingo uni kosako namana ba namgijana salbaani bilko man·gen. Aro ua bakgitchak ia a·gilsakona napchengani ja·mano ru·utgijan iarangni gimin uibana a·bachenga, aro uni namnikaniko aro namnikgijaniko, bamna skani aro bamna sikkijaniko mesokchapnaba a·bachengrona.

Ia a·selrangni gimin dambepition mande bi·sa chelchakgiparangko aro dakchakgiparangko nangberonga. Indakgiparang gnan jean janggichina dakanggipa namgipa re·ruragni ramako jaksi ota ba re·dila, aro gimagnichina dakanggipa ramako gelna didiata, chong·motan, bi·sani ma·a paa, kristian mondoli, aro songni school. Iarang krae ka·paode, aro sakprak ba ge·prakan bi·sani namgnina an·tangni dakna nanggniko chu·sokatode, bi·sa an·tangni namgipa, sronggipa, kakket aro bebeko dakgipa

ong·bagnini cholko namen dal·batatgen ba nambatatgen aro ia a·gilsakogipa rasongko nisiatgipa, cholonko ong·siatgipa aro ka·tongo gisikni janggiko nisiatgipa bilrangko warachake chena man·ronggipa ong·atgen.

Ia nama nanggniko chu·sokatna gita ia minggittamoni, chong·motan ma·a paa, mondoli aro schooloni, ma·a paani chol nambata, uamangni dai nangani dal·bata, aro uamangni detangko krae dakchakani nangbatani ong·a. Detangtangni gimin ma·a paarang Isolna agane on·na nanggnigiparang ong·a. Uamangni dai nangani dal·a ine uibo. Ma·a paarang detangko gonggea ramarangko re·atode detangni papko dakanini gimin ua ma·a paarangko dos gri ine Isol chanjawa.

Mondolini ba schoolni simsakaniona napangna skangba bi·sa ma·a paani simsakanio dongmitingo, ma·a paa detangni gimin simsakgija dake, namako skigija, ba namgijako dakna didiatanichi detangni cholonko ong·siatmanahaode, mondolini aro schoolni ua bi·sana dakgni palko name ba chu·soke dakna champengmanaha aro basakoba basakoba ampiljaatsrangmanaha. Indakgipa bi·sako mondoli ba school mamung dakeba dakchakna man·jahaon, ba uo uni ma·a paani detangni gonggeanganiko dimbregatna gong·gijanichi gimaaniko gapatna amjaon, ua ma·apaarang mondolico ba schoolko matnangjachina. Dos gnanggiparangko matnangskachina, chong·motan, janerao an·tangan nion uno nkgimin mandeko matnangchina.

Noktango katchapaani aro tom·tom ong·grikani, aro mondolini aro schoolni bi·sana namgniko dakanini pangchakanisan ma·a paani detangna namako skiani aro ranta ka·atani ong·aija, indiba uan jatangni soibho ong·aniko rikchengram aro rakkiram gita ong·a. Je jato ma·a paarang detangtangna namako skija, aro skatangko pilakni namgnina bamatna ranta ka·atja, ua jatan soibho jatrang baksa chanchapatako man·jawa, maina uarangko dakanganiara ua jato soibho ong·ani gunrangni nabaani ba dongkamaniko champenga. Je jatni mandeni dongram nokrango tom·tomani, ku·mongani, ka·rimpaani aro ka·sagrikani gri, uandakesan ua jat gimikan ong·gen. Jatni ku·mongani, ku·cholsan ong·ani, ka·rimpaani, gisiksan ong·anini pangchakchongmotaniara ma·a paani detangtangko gonggijagiparang ong·jana, skatang dakanikosan chanchijana, ka·sagrikchina didiatani aro skiani ong·a. Je gunrang jatko chuatchongmota, chong·motan kakket aro bebe ong·ani, iarangko uichengram aro skichengram ma·ani paani ja·arango aro uamangni name mesokanirango ong·a. An·ching gisik ra·na nanga, gam ba bilko man·ani, ba bobilko amani rasong aro uandakarang jatko chuatzgiparang ong·ja, indiba sastroo ru·utana skang indine sesoa gita, "Kakket ong·ania jatko chuata, indiba pap jatrangna kratchaatani ong·a" (Toe Ski. 14:34).

Da·ororo manderang sing·rongenga, Kristian torom giproroengoba jat maina chuatako man·kuja aro uni

ramram janggi tangani obostarang maina nambata ong·ja. Chuatako man·kuja ine aro obostarang nambata ong·ja ine inaniko anga jechakna sikgenchim, maina uarangko bang·bee man·jaoba on·titi man·aha ine anga bebera·a. Jatni manderang Kristian toromni miksonggnirangko gisik on·e tikkele am·ani kri jat chuatako man·gen. Indiba gamko dandakani, lekka porako man·ani, daka·rikanirangni bang·ani, me·su barini aro a·barangni aro bol biterangni silroroanio chuatako man·anina bate namen nambata chuatani gnan·jena jat miksongode ong·chongmotgipa ong·gni rasong ong·a, chong·motan pilak bebe dakanio, kakket dakanio, ka·sae dakanio aro rongtale dakanio chuataniko man·aniara pilak chasongrangna jatni dal·batgipa rasong ong·gni ong·a. Mande aro jatba Kristoni skiako ja·rikchina, unon pilak tom·tomaο aro katchaao janggi tangna gita pilak nanggnirang chu·sokatako man·bebegen, chong·motan, "Uni songnok aro toromko am·chengbo, unon ia pilakon na·simangna on·dapgen" (Mati 6:33). aro Isolni songnokko aro Uni toromko am·chengna skichengram ma·a aro paani ja·arango detangtangko skianian ong·a.

II. Detangna ma·a paani groko chotani.

Ma·a paani dai nangani mairongpile dal·a uko janapman·aha. Ma·a paa detangtangna ia gro nanganiko mairangko dake chotpilna man·gen, iani gimin da·o chanchie nina hai.

Adita bilsirang re·angmanaha Africa a·songni salgro jolo gitchambegipa Carthage songjinmani dongani biapko niktaiaha. Ua songjinmani dal·begipa mite nokni sambao a·ningchi ning·tue cho·e nie chongipa bi·sarang hajalrangni sogimin grengrangko nikaha. Ua grengrangko wa·alo so·aha ine nika maina wal·ku nangani aro kamani chinrangko nikaha. Uororo ma·a paarang ua mite nokni mite Moloch·ko namnikatna gita detangtångko wa·alo re·pretate boli on·aha. Ia grengrang indakgipa boli on·gimin bi·sarangnin ong·achim. Sastroo sea gita ua ma·a paarang "an·tangmangni mite dakanirangna an·tangtangni dedrangko so·otaha" (Ezek. 23:39). Indakgipa bilongbee namen ka·saninggijaniko knae an·ching an·skitnaba donga.

Da·ororo pilakba indake dakjawachim ine ina. Indioba da·ororo una bate ma·a paarang detangtangna dakenga. Detangko Moloch·na boli on·ode be·en mangmangsan nisiatako man·aha, indiba da·ororo ma·a paarang detangtangni be·enko ong·aigija indiba gisik aro ka·tong aro janggiko Nisiatgipana chanchigija dake dakenga. Basako ? aro bao ? ine saoba sing·a. Jensalo ma·a paarang detangtangni gisikni janggini gimin simsakjasrang, jensalo ma·apaarang detangtangko Isol aro Isolni Songnok baksa skianichi aro dake mesokanichi nangrimatna jotton ka·ja, jensalo ma·a paarang detangtangna Isolni gimin aro Uni ka·saanini gimin aro Uni namnikanirangni gimin aro Uni bi·sarangko dabanirangni gimin skichanga, jerangni bi·sarangna bate matburungrangni

bi·satangrangan an·tangtangko dugipa matburungoni skiako man·bata - - uandakgipa ma·a paarang da·ororo detangtangko be·enko aro gisikko aro janggiko Nisiatgipana boli on·gipa ong·a.

Detangtangko namatna ma·a paani skichenganian torom ong·a.

Sastroo seani minggittam gnang jerangna ma·a paarang gisik on·na nanga. Uarang ian, "Jihovana kenania u·ianini a·bachengani ong·a" (Toe Ski. 1:7); "Nang·ni Isol Jihovana ka·sana nanga . . . Ia kattarang nang·ni ka·tongo dongna nanga; aro na·a uarangko nang·ni dedrangna skitaitaina nanga" (Deut. 6: 4-7); "Nang·ni pilak rakkianirangna bate ka·tongtangko rakkibo; maina uanonin janggini ong·katanirang ong·a" (Toe Ski. 4:23). Isolna kenani, Isolna ka·saani aro ka·tongtangko maikai rakkina man·gen iarangko detangtangna ma·a paani skina nanggni namanirang ong·a. Je jat ba je ma·aparang ia skianiko mania, ua jat aro ua nok illenggijagipa, kakket aro bebe ong·gipa ong·gen.

Bi·sa ja·achi re·srangna ambrekujaontaltal toromko skina nanga. Ian ma·gipani ong·bata kam ong·a, maina unsalo ma·gipani simsakanio bi·sa ong·bata. Indiba pagipaba uni palko dakna jechakjachina. Ma·gipa baksa ka·pana amchongmota aro nangchongmota. Bi·sa bilsni ong·kujaon skina a·bachengna nanga. Uan dal·nikbegnini ong·a, maina indita dambe ong·on bi·sao namgipa dakbewalrangni ja·pangrangko donani ong·a. Beben saoba

saoba iako bebera·jawa aro bebera·gijagiparang
 detangtang bilsni on·kujaon ba on·manoa uarangko
 matburungrangni bi·sarang gita jakgitel dongna, skatang
 dakna ma·a paani kattako manijana, ge·etako ra·jana
 on·aria. Oe, basakoba basakoba ma·a paarang
 an·tangtangan detangtangni skarangna an·tangtangko
 bamatskaa. Ian gualbeani on·a, aro uni bite nanggni ua
 bi·sarang brion mandeskana ka·sagijagipa,
 an·tangtangnasan ka·sagipa, skatangkosan dakarigipa
 manderang on·a. Manderang basakoba basakoba goka
 gita daka. Uamang mi ge·ani gimin simsakbegen indiba
 detangtangni gimin simsakja. Mechil jawaiako duule
 dilengata maikai matchurang chabaenggipa nosto
 ka·ninggni miko ga·belbele gimaatna man·jawa, indiba
 detangtangni jawaiiao chabaengmitingo mamung
 rakkianirangko donja ba uno warachakanirangchi
 duulatja - - Nisiatgipana skatang dake, champengani gri,
 detangtangko ga·belbelna on·a, da·nang !

Chongipa bi·sana gisik brigipana gita toromko
 skina nangja, indiba uni chakna ama gita skina nanga.
 Bakgitchakna matchu be·enko alja, sok kanaia, maina ua
 matchu be·enko oktango jrongatna amjawa. Uandake toe
 bi·sana toromko skina nanga. Isolni gimin skibo, indiba
 bi·sani chakna amani kri skibo. Isolan Salgio donggipa
 Pagipa on·a. Ua pilak janggi tange illenggiparangko
 dakaha, uarangna ka·saa aro uamangni bebe aro nama
 dakaniko namnikbea ine skibo. Ma·gipani ja·ao attamprako

degipana chonbemitingo Isolo bi·aniko skina a·bachengode nama. Isolni Degipani gimin skibo, maikai ua ia a·gilsako bakgitchak ong·e atchie dal·oroaha aro Uni Salgini Pagipani namnikaniko pangnan dakaha, aro maikai namana ka·sagija namgijagiparang Uko chisolo so·otaha, aro maikai Isol Kristoko sigiminrangoni tangpilataha aro Ua da·o Salgio Uni Pagipa baksa an·chingko dakchakenga. Isolni an·chingna ka·saaoni an·ching maikai ka·sagrikna nanga ine naate detangko skibo.

Detangtangna toromko skion ma·a paa an·tangtangan gisik ra·china, jerangan uamangna ong·chongmotani ong·ja ba uamangni ka·tongrangni kosako bilko man·ja uarangko detangtangna uamang name skina ambrejawa. Ma·a aro paa kattachi aro kamchi Isolna ka·sagiparang ong·jaode, aro Uo bebera·giparang ong·jaode, Isolna ka·saaniko aro Uo bi·aniko detangna skina nangbegen. Batesa bi·sa an·tangan dambepition ua chanchipilaniko uininggen. Bi·sarang indagipa ong·chongmotgijaniko maibakai rim·ninggiparang ong·a.

Detangtangna toromko skiani gimin Sastorango indake seani ngang:

"Knatimbo, O Israel, an·chingni Isol Jihova Saksasan; aro na·a nang·ni janggi gimikchi, aro nang·ni bil gimikchi, nang·ni Isol Jihovana ka·sana nanga. Aro Angni nang·na da·alo ge·eta ia kattarang nang·ni ka·tongo dongna nanga; aro na·a uarangko nang·ni dedrangna skitaitaina nanga, aro nang·ni noko asongmitingo, aro ramako

re·mitingo, aro tugitelengmitingo aro chakatmitingo, uarangni gimin na·a agangrikna nanga" (Deut. 6:4-7).

Jatsa gnang jean ia poraigimin ge·etanirangko ra·srange manisrangaha aro ua jatan uarangko maniani chin biteko chasongrangoni chasongrangona cha·pagiparang ong·baaha. Ua jat Jihudi jat ong·a. Da·ororo uamang gita duk man·begipa jat a·gilsko dongja. Ua jatni itihasko poraiode uamangara dukrangko man·giparang ong·a gita nika. Bilsi ritchabrina agre bilsi 586 B.C. intaltal ua Jihudi manderang songtang gri gipin jatrangni gisepo songdongpagiparang ong·a. Gipin jatrangni namnikgijaniko, sao on·aniko, sinjetaniko, chonnikaniko, jitroroataniko, ra·draaniko, ra·sekaniko, patoko donaniko, dokako, so·otaniko man·ronggipa jat ong·a. Da·ororo Germany a·songo uandagiparang dukko man·engpiti, da·nang. indiba uamang indagipa balko bilsi ritcharangni gisepo ripena nanggiparang ong·oba, aro pilak gipin jatrangna bate champengako man·batgiparang ong·oba, uamang uarangko chegiparang ong·a ine an·tangtangko mesokaha, maina ua jat kim·kim ketket ma·gapgrikaniko man·a, Jihudi Jihudiskako pangnan dakchaka, uamango chakchikani bil bang·a. Indakesan ong·aija, Jihudirangni gisepo a·gilsakni skiako man·kalgiparang gnang, changbatgipa doctorrang, philosopherrang, skigiparang, ki·tapko se·giparang, mathematicianrang, ring·na aro ma·manti sika moanirangko kal·na changgiparang aro mandeskarangni dukko dakchakgiparang bang·a donga.

Iani a·sel mai ? Uamang, "Knatimbo, O Israel, an·chingni Jihova saksasan" ine ingipa kosako poraigimin Sastrorangko aro uandake Sastrorangni gipin nama ge·etanirangko aro beng·anirangko gisik on·e manichongmotronga. Uamang detangtangrangko chonbegipa bi·sa intaltal Isolni gimin aro Uni namnikanirang aro namnikgijanirangni gimin, rongtalani aro ka·sagrikanini gimin aro saksa sakgipinko dakchakgrikanini gimin, aro mande an·tangni gnangaoniko cholgrigipa aro kangal cha·asigipako dakchakna nanggnini gimin skiaha, aro maikai ma·a paarang ua mande ra·aniko man·a an·tangtangan kragiparang ong·na nanga, iani giminba skiaha. Uandake uamang jatko kim·kim rikaha jekon mamung duk, a·rikatani, ba gimaataniko man·aniara illengatna ba nisiaatna mamung saloba amkujachim. Isolosan kimkim ka·donggija aro Isolni gimin skianiko ma·a paarang detangtangna on·rikrikani dongjahaode, ia Jihudi jat ru·utana skangan bon·atsranggimin, gipin chasongrango gisik ra·aniko man·gijagipa jat ong·aigenchim. Uamangni chakchikani aro tangrooroani bilara, uamangni Isolko ui·ani, Uo ka·dongani, Uko maniani aro ma·a paani detangtangna toromko skianiko on·rikrikania ong·a.

Ma·a paani detangtangko skina nanggni mingprakprakni gimin badale janapna iano biapan dongja, indiba mingprakprakko mingaigen, chong·motan: Ma·a paani kattako ra·ani. Indiba ua kattako ra·anion detang kratcha·atpilaniko man·jana gita ma·a paa an·tangtangan

an·tangtangni kattani aro ge·etanini gimin simsakbena nanga. Ma·a paana bamgiparang ja·mano brienba songni niamko pe·giparang ong·jawa. An·tangnasan ka·saaigija indiba sakgipinrangko chanchirongani aro uamangni nanggniko aro namgniko chanchianiko skiani. Ma·a paa an·tangtangnasan ka·saaigiparang ong·ode ua ka·saako detangna skina nangbegen. Bebeko aro kakket dakaniko skiani. Maiba ong·aniko donuna gita ma·gipa detangko pagipana tol·na skiode, iarangko skiani ja·pangko nisiatsrangman·aha. Rongtalani gimin skiani, be·eni rongtalani aro gisikni rongtalani; indiba moila gapgipa noko ba be·en aro gisik rongtalgi jagipa ma·a paa rongtalaniko skianina champengbeani ong·a. Chakchikani, ma·a paa an·tangtangni chakchike dakanirangchi iarangko skina nengrabatgen, indiba chakchikani ge·etani ong·ja indiba an·tangni dakanichi mesokani ong·bata. Mandeskako mande ra·ani, Isolni pilak dakgimin ja·sambri, aro sakoni do·drangna aro illenggiparangna ka·sagijaniko dakgijani, an·tangni skarangko bamatani, ka·sachakani aro indakarang detangtangna ma·a paarangni skina nanggnirang ong·a. Mondoli aro schoolba iarangko skina dakchakpagen, indiba ma·a paani skichengani grisrangode ba dakchakpaani grisrangode mondolini aro schoolni kam ong·gramainaba donga. Mingsako an·ching gisik ra·taitaina nanga, chong·motan jatni ka·sae bebe aro kakket dakaniara ua apsan jatni ma·a paarangni noktangtangrango chongipa detangtangna ka·sae bebe aro kakket dakaniko

skiani aro an·tangtangni janggi tanganio ua gunrangko mesokani kri ong·gen, indiba, uko badeangjawa ba chubatangjawa. Chi donchakramo donggipa chi jokangode donchakramo donggipa chini a·aoni chuana bate batkale jokdona amja.

III. Detangtangna krae aro kragija dake sastiko on·ani.

Basakoba basakoba detangtangna ma·a paa sastiko on·na nanga. Aro sastiara bi·sani namgnina ka·pachongmota. Saoba saoba ma·a paarang Sastroni gipin ge·etanirangko manirongjaoba Sastroo maiba skiani gnang jeko uamang agredugae mania, chong·motan detangko dokani gimin indine skianiko tikkele mania, "Bi·saoniko doke skianiko ra·riknabe, maina na·a uko betsmitchi dokoba ua sijawa . . . An·tangni betsmitko salrikgipa an·tangni depanteko mitchia; indiba una ka·sagipa nanga gita uko doke skia" (Toe Ski. 23:13; 13:24).

Betchi ba jakchi pilnipil pilnipil dokaniara detangna ma·a paani kosako tochakani ong·ode, saoba saoba ma·a paarang detangtangna ka·sabea ine inskana man·genchim. Indiba indakgipa agredugae betchi dokgipa ma·a paarang detangko bet dokanichi detangni be·eno pari dakatpiloba gisikni branganiko ba namgijako namatjanaba donga, maina an·tangtangni ka·onangani a·sel ba a·jak sokatani ba ka·sachakgijani a·selsan sastiko on·a. Ka·onanganiara

ba a·jak sokataniara betko rim·gipa ong·ode, sastiko on·aniara ong·gramaiani ong·aija indiba detangko namgijako bilongbate dakangna didiatgipa ong·baskanaba donga. Unsalo betko salrikaniara namen nambata. Detangko bet dokaniara ma·a paani ka·tongkoba dokchapode, chong·motan uamangba dukko man·chapchongmotode, indakgipa dokani detangna an·sengatani sam gita ong·bana ama.

Betchi dokanina agreba detangtangna sastiko on·ani chol bang·a aro nambata gnang ine gisik ra·bo. Uarangko ma·a paarang jakkalangchina. Sastiko detangna on·on ia niamko ja·rikpaode, bang·e brangjawa, chong·motan bi·sani namgijako dakani kri sastini rokom ba jrimani ong·china, aro, ong·na amode, ua sastiko on·aniara bi·sani namgijako dakgiminko namatpilaniba on·pilani ba repair ka·ani rokom gita ong·china. Sastroo segimin gita ong·china, chong·motan, "Pagiparang, detangtangko ka·onangatnabe, indiba Gitelni skianio aro de·mesaanio uamangko mande dakbo" (Eph. 6:4).

IV. Detangtangko namatna skianiaara ma·gipanima ba pagipani dai ?

Da·o segimin ia sing·anina sechakna dakchakna gitasa seaiaha, indiba sing·aniko chu·soke aganchakkuja. Beben, uko chu·soke aganchakna amja, aro chu·soke aganchakna amgipako anga ui·ja. Mande ja·achi re·on badia ja·a nangbatgipa ong·a, jakranima ba jakasini ?

Sakoni do·o bangbango bilon badia grangko nangbata, jakranima ab jakasini ? ine sing·anirang gita ia probondoni sing·ani ong·a. Je ja·aba ong·chong jean namja, jakra ong·chong jakasi ong·chong, keng·be keng·be teng·dik teng·dik dakesa re·aigenchim, aro do·oni je grang be·aha, jakra jakasi ong·chong, bilpakpake bangbangona bildoangna amgija dongarigenchim.

Ma·a aro paa detangtangko namatna skina sakprakan apsan gro nanggnigipa ong·a, aro aiao je ma·ana ba je paana jean grotangko chotna gelnajotton ka·a. Bi·sani bilsibang·ani, aro ua me·a ba me·chik ong·ani kri, detangko namatna skiani tongtong ong·gipa pal ma·gipani ba pagipaniba ong·a, indiba detangna, me·a ba me·chik ong·bo, ma·ani aro paaniba pal donga. Ma·a paani detangtangko namatna jotton ka·anion, ba namako skianion, an·tangko bamatna uko ranta ka·anion aro uni namgniko chanchion, uamang sakgnian, gisiksan ong·ao, ku·mongna aro ka·rimna nanga. Ong·jaode, salpaani pal uamangni dakaniara salgrikanisa ong·aigen. Pagipa detangna ma·gipani beng·ako ge·etskaode, ba ma·gipa pagipani beng·ako ge·etskaode, ba pagipa ma·gipani nama ine inako namja ine inskae ma·gipako chonnikode, ba ma·gipa pagipani dakako uandake chonnikode, ba pagipani ka·onanganiko champengna gita ma·gipa detangko pagipana tol·na ge·etode, ua nok illenggipa ong·e ga·aknaba donga, maina bol ning·o bolko cha·gipa jo·ongrang ua nokni krongrangko nosto ka·enga. Je noko ma·a paa ka·sagrika

detangtangna skiani, ranta ka·ani aro namgnini gimin chanchipaa, ku·monggrika, dakrimpaa, ua nokogipa bi·sarangni mikkangchi ong·bagnini gimin kenchakani gri.

V. Ma·a paa ong·ani mairongpile dal·nikgnini ong·a.

Sastroko segiparang mande baksa Isolni nangrimani mairongpile nama aro namgnina kapaa, uamang a·gilsakni biding pagipani aro ma·gipani detangtang baksa nangrimaniko indine toe mesokaha, "Anga na·simangko ra·chakgen, aro anga na·simangni Pagipa, aro na·simang angni depanterang aro demechikrang ong·gen ine Bilakbatgipa agana" (2 Kor. :17, 18). Sastroko segiparang manderangna Isolni ka·sachakbeaniko mesoke tona ine dedrangna a·gilsakni biding pagipani ka·sachakaniko indine toaha, "Pagipa maikai an·tangni dedrangna ka·sachaka, uandake an·tangna kengiparangna Jihova ka·sachaka" (Git. 103:11-13). Sastroko segiparang manderangna Isolni simsakani aro namgniko dakaniko toe mesokna ine a·gilsakni biding pagipani detangtangko aldumittanganiko indine toaha, "Na·simang namgija ong·eba na·simangni dedrangna namnamako on·na ui·ode, indide mairongpile bate salgio donggipa na·simangni paa, Uo bi·giparangna namnamako on·gen ?" (Mati 7:11). Sastroko segiparang manderangna Isolni tipgijagipa ka·saako tona ine a·gilsakni biding rinok rinok ong·batgipa ka·saanina bate Isolni ka·saa mairongpile batgipa ong·a ine indine toaha, "Jihova angko watgalaha, aro Gitel angko gualaha ine Zion aganaha.

An-tangni satipni depantena ka·sachakjana gita me·chik an-tangni sok cha·gipa bi·sako gualna amama ? oe, iamang gualnaba donga, indiba anga nang·ko gualjawa" (Isaia 49:14, 15).


Uandake detangtang baksa ma·a paani nangrimaniko aro uamangna dai nanganiko tosusaani gita jakkale Sastroko segiparang manderangna Isolni simsakani namgniko dakani aro tipgijagipa ka·saaniko skiaha. Isol chubatgipani namanirangko, ka·sachakanirangko, simsakaniko mesokna gita uamang toani gita jakkale a·gilsakogipa manderangni gisepo chubatgipa aro gamchatnikbatgipa nangrimanirang aro dai nanganirangko jakkalaha, chong·motan detangna ma·ani aro paani ka·saani, skiani, ranta ka·ani aro simsakani. Una agre dal·bata gri. Detangtangko namatna skianio ma·gipani aro pagipani dai nanggni mairongpile dal·a, mairongpile aiao inmanani, mairongpile nanggni ong·a.

Aro bi·sarang mairongpile gamchatnikgiminrang ong·a. Jisuni indine agananirangko gisik ra·ode ma·sigen, "Bi·sa chongiparangko angona re·bana on·bo, uamangko da·beng; maina indakgiparangnin Salgini Songnok ong·a . . . Beben anga na·simangna agana, Na·simang pil·e bi·sa chongiparang gita ong·jaode, na·simang mamung dakeba Salgini Songnoko napjawa . . . Je mande angobebere·gipa ia chongiparangoni saksako ja·gidotatgen, uni gitoko jatani ro·ong dal·gipako kadingdee uko sagal tu·ao dubiatan una nambata" (Mati 19:14; 18:3-6).

Jekai Zakarius Johonni gimin sing·aha uandake ma·a paa sakprakprakan an·tangmangni deni gimin sing·naba donga, "Ia bi·sa mai ong·gen?" Ua sing·anina aganchakani uamangni jako gnang. Uamangni detangko skiani rokomo, namgniko dakanio ua sing·anina aganchakani gnang. Ma·ani jakosan ong·srangja, paani jakosan ong·srangja, indiba sakgnini jakrango dongchongmota.

No.20 (1000) 1940.

F. W. Harding.



**Published by -  Tura Book Room, Tura and
Printed at - Panthi Offset Printers, Sukbir Bhawan, Tura.**